



Prijetnja i za BiH

Više od 150 državljana BiH na stranim ratištima



SARAJEVO - Na stranim ratištima trenutno se nalazi oko 150 državljana BiH, rekao je šef Odsjeka za borbu protiv terorizma u Agenciji za istrage i zaštitu (SIPA) BiH Amer Veiz. On je dodao da je, prema raspoloživim informacijama, poginulo oko 26 osoba, a oko 50 ih se vratilo u BiH.

Profesor Fakulteta političkih znanosti u Sarajevu Vlado Azinović ocijenio je da ljudi koji su se vratili sa stranih ratišta mogu predstavljati određenu radikaliziranu prijetnju.

-Dobar dio onih koji su se vratili sa sirijskog ratišta vidno je razočaran, jer nisu vidjeli ono što su očekivali i ono što im je obećavano. Ti ljudi mogu poslužiti kao potpora za izgradnju kontranaracije - rekao je Azinović za Televiziju N1.

Azinović je dodao da je tu riječ o ljudima koji dolaze iz potpunih margina, odnosno ljudi s ekonomskih margina, koji nemaju drugih izbora u životu, imaju vrlo malo znanja i koji svoju budućnost nalaze u zemlji i konfliktu koji ne razumiju. Dugogodišnji profesor

Gazi Husrev-begove medrese Mustafa Spahić kaže da treba odbaciti terorizam ili radikalizam bilo koje vrste.

-Terorizam je posljedica toga što čovječanstvo na mnoga pitanja nema pravovremene i primjerene odgovore. Mora se napomenuti da je tzv. Islamska država samoproglašena i samoimenovana država, jedno čudovište iz više od 90 zemalja svijeta i nema veze s pravim islamom - rekao je Spahić. On je istaknuo da se ljudstvu i čovječanstvu nudi jedna slika svijeta, a svi prvi valovi su u Siriju išli s ciljem rušenja Asadovog režima. Spahić je dodao da je mlade ljude najlakše vrbovati ili navesti na nešto posredstvom društvenih mreža, jer to je jedna vrsta modernog govora koji prolazi kod mladih. On je istaknuo da je selefija najbolji mogući vjernik i da to ne treba vezati za radikale.

-Radikalisti i teroristi su drugo. Ne može biti muslimanski motiv ubiti osobu s kojom se nikad nije susreo - istaknuo je Spahić.